

Flerschem unn de Hessedaach

Wie merr uns deletz d getroffe hadde, de Karl, de Schorsch unn isch, doo hawwe merr iwwer de Hessedaach in Risselsem gebabbeld.

Seet de Karl: No ja, wenn merr dess su lese dut, iss dess joo e mords Fest. Awwer isch waaß nitt, ob die Fraa unn isch emol dooniwwer fahrn, doo iss uns zu vill Truwel.

Moont de Schorsch: Ei ferr uns Flerschemer isses doch oofach. Mir kenne, wie se schreiwe, mett de Fährr – ess iss joo koo Fährr, ess iss e Personeschiff – vunn unne omm Moo bis eniwwer onn dess neie Ufergelänne fahrn, kenne uns umgugge, bis bei die Fesdung laafe unn späder widder zurigg fahrn. Mir wernn dess emol mache.

Isch saach: Mir aach, es muss joo nitt grad onneme Somsdaach odder Sunndaach soi, naa, mitte in de Woch isses besser. Oogugge sollt merr sich e bissi was vumm Hessedaaach, die Risselsemer hawwe sich vill Mieh gewwe.

Moont de Karl: Vill Mieh - unn wernn omm End doch druffleh. Die Frooch iss nor, wivell Millione dess wernn. Beim Hessedaach hott noch koo Stadt ebbes verdient.

No ja, seet de Schorsch, doo kimmts heitzedaach nitt druff oo. Dess Immitsch isses, warum merr sich su e Fest ufflaade dut, dess Immitsch, unn grad ferr Risselsem isses Zeit, doodeferr ebbes ze due. Die gonse Johnn hott merr nor schleschde Noochrischde vumm Opel geheerd, dess soll jetz onnersders wernn. Wie schreiwe se: Von der Arbeiterstadt zur Denkfabrik, dess heert sich joo gut oo.

De Karl hott meddem Kobb gewaggeld. Ob ferr uns Flerschemer e bissi Immitsch abfalle dut vumm Risselsemer Hessedaach?

No klar, saach isch. Wenn Leit hier nooch Flerschem kumme, bei uns omm Moo parke dun unn späder meddem Schiff zuriggkumme, doo kennt merr dene unnerweeschs verzähle, dass de Adam Opel sellemols die Tour aach gefahrn iss, meddem Nache, weiler soi Nähmaschin ins Ländsche bringe wollt.

Dess iss awwer koo Immitsch ferr Flerschem, seet de Karl, wenn bei uns, egal wo die Schneidergeselle herkomme sinn, su e nei Maschin mett Schdoo beworfe worrn iss.

Isch grins: Wenn merr die Geschicht su verzähle dut, donn hosde recht, Karl. Merr musse onnersders verzähle.

Ei wie donn?, frächt de Schorsch.

Isch grins noch mieh. Dess warn koo Hondwerksgeselle, dess warn Schauspiller vunn emm Flerschemer Verein, die doomols schunn gern Theater gespilld hawwe, unn die de Opel bezahlt hott.

De Schorsch druff: Heer merr uff, Honnes,

Jetzt habb isch gelachd. Doch. Stellt eich emol vor, de Opel wär meddem Nache iwvergefahrr, hädd die Nähmaschin uffen Karrn gelade unn häddse ins Ländsche transportiert, hädd dess Noochrischde odder Immitsch gemacht? Hädd oon Giggel denooch gekräht? Naa. Awwer Schdoo uff die Maschin, ferr Arbeitsplätz bei de Schneider ze redde, dess hott in jeder Zeidung gestonne, dess hott jeder verzählt unn donn ..

Unn donn was?, frächt de Karl

Isch saach: Unn donn hott de Adam Opel sich vor Ufftreesch nimmi redde kenne. Unn dasserr dess dene Flerschemer Schauspiller ze verdonke hott, dess misse merr verzähle, dess dut Immitsch gewwe, weil donn duts in Zukunft jeder wisse unn konns allsfort in de Zeidunge lese: In Flerschem iss fast jeden Daach Theater!

Eiern Honnes